

元史新編

元史新編卷十一

本紀九

泰定帝

泰定皇帝諱耶孫鐵木爾世祖嫡曾孫晉王甘麻剌長子英宗叔也初太子真金生三子長曰甘麻剌次曰荅剌麻巴剌三卽成宗荅剌麻巴剌先薨世祖封甘麻剌爲晉王出鎮北邊至元十三年十月二十九日生帝于晉邸世祖崩甘麻剌奔赴上都諸王大臣皆以晉王爲冢孫義當立甘麻剌乃遜位于弟而自願歸藩成宗之得立由晉王之讓也大德六年晉王薨帝襲封仍鎮北邊武仁二帝之立咸與翊戴有盟書賜南康路六萬五千戶爲食邑英宗卽位告饑振鈔百萬貫後遣使以地七千頃歸朝廷請有司徵租歲給糧鈔執藩臣禮甚謹先是王府內史倒刺沙得

幸于帝仁宗朝以其子哈散事丞相拜住得入宿衛偵伺中朝事久之脫歸知御史大夫鐵失與拜住意相忤欲傾之亂且作以其故告帝至治三年宣徽使探忒來王邸與倒刺沙言主上將不利於晉王八月二日帝獵於圖刺之地鐵失密遣幹羅思來告曰我與阿散耶先鐵木爾失禿爾章台謀已定事成當推王爲帝又以告倒刺沙且言惟汝與馬速忽知之勿令旭邁傑得聞也于是帝大驚命囚幹羅思遣使赴上都以逆謀告未至而難作諸王按梯不花淇陽王耶先鐵木爾奉皇帝璽綬來迎九月癸巳帝卽位於龍居河頒蒙古詔赦天下以耶先鐵木爾爲右丞相倒刺沙平章政事乃馬台爲右丞善僧爲左丞鐵失撒的迷失完澤馬某沙竝知樞密院事馬速忽章台同知樞密

院事圖滿同僉樞密院事李羅爲宣徽院使旭邁傑爲宣
政院使阿散爲御史中丞失禿爾爲大司農蓋雜用新舊
以安反側己亥諭銓選一歸中書惟樞密院御史臺宣政
宣徽二院得自擬奏辛丑召諸王官屬流竄邊遠者還本
部冬十月甲子遣鐵失赤斤等詣大都以卽位告天地宗
廟社稷輟耕錄云晉邸入繼大統告祭太廟之禮陰風北來殿上鐙燭皆滅良久方止諸王買奴
進曰不誅元凶則陛下善名不著天下後世何從而知非
與聞其故乎帝然其言誅逆賊耶先鐵木爾完者圖滿及
鐵失弟鎖南等于行在所命旭邁傑爲右丞相召陝西左
丞相圖魯通政院使紐澤竝爲御史大夫遣旭邁傑至大
都收鐵失及其黨失禿爾赤斤脫火赤章台等悉誅之竝
戮其子孫己巳太白犯亢丙子犯氐加內史按答出太師

知樞密院事以速速爲御史中丞帝發北邊十一月己丑朔熒惑犯亢車駕次中都修佛事于昆剛殿庚寅太白犯鉤鈴己未犯東咸辛丑帝至大都壬寅熒惑犯氐丁未御大明殿受朝賀癸丑遣官詣曲阜以太牢祀孔子丁巳祭遁甲五福神敕凡有罪自首者槩與原宥十二月己未詔雪楊朵爾只蕭拜住賀勝觀音保鎖咬兒哈的迷失李謙亨成珪王叔高昉張志弼普顏篤卜顏忽里等冤存者召用死者各賜官壬戌役夫萬三千五百人浚鎮江漕河及練湖戊辰追尊皇考晉王甘麻剌曰光聖仁孝皇帝廟號顯宗皇妣晉王妃曰宣懿淑聖皇后己巳辰星犯壘壁陣庚午盜入太廟竊仁宗及莊懿慈聖皇后黃金主乙亥太常禮儀院言世祖以來太廟歲惟一享先帝始復古制一

歲四祭帝曰祭祀國之大事朕何敢簡其禮命仍舉四祭
從御史趙成慶言鐵木迭爾子鎖南及月魯圖圖哈速敦
皆坐與逆謀伏誅辛巳熒惑犯東咸癸未流逆黨諸王月
魯不花于雲南按梯不花于海南曲呂不花于奴兒干孛
羅兀魯思不花于海島以諸王買奴自拔逆黨逃赴上都
特封秦寧王命前太師拜忽商議軍國重事倒刺沙爲左
丞相敕嶺北省臣修佛事以卻寇兵西僧祈禳大內以厭
雷塑馬哈吃刺佛像于延春閣之徽清亭丁亥改元詔曰
朕荷天鴻禧嗣大厯服側躬圖治夙夜祇畏惟祖訓是遵
開歲甲子景運伊始思與天下更新稽諸典禮踰年改元
可以明年爲泰定元年免大都興和差稅三年八番思播
兩廣洞寨差稅一年江淮勑科包銀三年四川雲南甘肅

秋糧三分河南陝西遼陽絲鈔三分除虛增田稅免幹脫
逋錢振恤雲南廣海八番等處戍軍求直言賜高年帛禁
獻山場湖泊之利改吏員出身者秩許至四品是歲廣州
新會民汜長弟作亂雲南開南州大阿哀阿三木台龍買
六千餘人寇哀卜白鹽井車里于孟寇雲南西番寇鞏昌
府各降詔招諭

泰定元年甲子春正月乙未重作仁宗及慈聖皇后金主
成奉安太廟以乃馬台平章政事甲辰敕譯列聖制詔及
大元通制刊本賜百官戊申八番生蠻韋光正等及楊黃
五種以二萬七千戶來降置長官司撫之己酉召親王圖
帖睦爾于瓊州阿木哥于大同丙辰封解州鹽池神曰靈
富公定怯薛台歲給鈔人八十錠二月丁巳朔作顯宗影

室甲子作佛事用僧八百人及倡優百戲導帝師游皇城

庚午選守令推官

舊制臺憲歲舉守令推官二人有罪連坐至是言其不便復命中書于常選擇

人用

甲戌初開經筵命張珪王結吳澄鄧文原充講官以

帝範資治通鑑大學衍義貞觀政要等書進講是月上大
行皇帝尊諡曰睿聖文孝皇帝廟號英宗三月丁亥朔立
詹事院以太傅朵台爲大子詹事楊廷玉爲中書參知政
事耶爾吉尼知樞密院事給蒙古流民糧鈔遣還所部有
擅徙者斬丙午立八不罕弘吉刺氏爲皇后以皇子阿速
吉八爲皇太子八的麻亦爾閒卜嗣封晉王夏四月庚申
作昭聖皇后御容殿於普慶寺

按昭聖皇后文宗母也此時未應追尊作殿史必有

誤辛酉親王圖帖睦爾至自潭州甲子車駕幸上都留諸
王寬徹不花失刺平章烏伯都刺右丞善僧等居守發兵

民築渾河堤辛未月食既癸酉以圖滿迭爾平章政事庚辰帝以風烈月食地震手詔至大都戒飭百官曰比者災異屢見朕以憂天下爲心反躬自責謹守祖宗成訓修德慎行爾等宜各勤乃職以荅天意并令廷臣集議時政得失五月丁亥御史董鵬南等言平章乃馬台宣徽使帖木爾不花詹事圖滿荅爾皆黨附逆徒有虧臣節乞正其罪以消天變不報帝諭省臣曰朕卽位以來無一人能執成法爲朕言者知而不言則不忠且陷人於罪自今凡有所見宜悉以聞使朕明知法度不敢妄自縱欲非獨朕身天下一切政務能守法以行則眾皆乂安反是則天下罹于憂苦又曰凡事防之於小則易救之於大則難爾其以朕言明告有眾俾知所慎壬辰省臣以災異皆抗疏乞罷帝

曰卿等皆辭去國家大事朕孰與圖優詔慰留之戊戌遷
列聖神主於太廟新殿丙午太白犯鬼侍御史高奎上書
請求直言辨邪正明賞罰帝嘉其言賜銀幣丁未太白犯
鬼積尸氣六月乙卯朔蒙化州土官高蘭神場寨主羅九
寇威楚路庚申張珪至上都奏在廷集議言逆黨未討奸
惡未除忠憤未雪冤枉未理政令不信賞罰不公賦役不
均財用不節請裁擇以回天變不報癸亥作禮拜寺于上
都及大同路給鈔四萬錠丙寅廣西兩江土官黃勝許岑
世興遣其子弟入貢各授沿邊溪洞軍民安撫使丁卯大
幄殿成作鎮雷坐靜佛寺帝受佛戒于帝師庚午置海刺
圖屯田總管府己卯詔疏決繫囚免天下和買雜役三年
百官四品以下普覃散官一等三品遞進一階遠仕瘴地

身故不得歸葬者有司資給還鄉秋七月丙戌思州平茶
楊大車酉陽冉世昌寇小石卯凱江等寨庚子命諸王伯
顏帖木爾出鎮闊連東部撒忒迷失率衛士佐太師按塔
出行邊癸卯放廣閩采珠蟹戶爲民仍免差稅一年丁未
置長慶寺掌成宗幹耳朵諸事罷中瑞司汰東宮衛士
止三千人近增至萬七千人命詹事院汰去仍舊制廣西慶遠徭潘父絹等率眾來
降八月乙卯敕刑獄復隸宗正府刑部勿與辛酉遣翰林
學士承旨幹赤祀太祖太宗睿宗御容于普慶寺庚午作
枅木殿椽殿及中宮金脊殿丁丑罷浚玉泉山河役九月
乙酉封耶速不堅爲荊王辛卯罷哈思的結魯思伴卜總
統所更置臨洮總管府乙巳順宗皇后忌日修佛事飯僧
萬人改邕州爲南寧路冬十月戊午立壽福總管府典累

朝神御殿祭祀庚申命左右丞相日直禁中有事則赴中書丙寅太白犯斗己巳入斗太陰犯填星庚午太白犯斗眞州珠金沙河松江府吳江州諸河淤備民丁浚之命有司兼知渠堰事丁丑封親王圖帖睦爾爲懷王以魯國太長公主女爲王妃壬午熒惑犯壘壁陣遣官分銓閩海兩廣四川雲南選十一月己亥以朮溫台知樞密院事辛丑造金寶蓋飾以珍寶貯佛舍利甲辰作歇山鹿頂樓于上都十二月癸丑朔雲南徭阿吾爲寇庚申同州地震癸亥鹽官州海溢有司請壘石爲塘帝曰築塘是重勞吾民也其增石固扞禦之丙寅敕修英宗顯宗實錄定内外官行禮雨雪免朝服庚午熒惑犯外屏乙亥太白經天曲赦重囚三十八人爲三宮祈福是歲兩浙及江東諸郡水旱壞

田六萬四千三百餘頃大同渾源河真定滹沱河陝西渭水黑水任縣沙澧洛水定州屯河渠州江水皆溢漂民居成紀縣山崩水溢壅土至來谷河成巨阜各屬振有差二年乙丑春正月丙戌辰星犯天雞戊戌西番參卜郎來降賜其長班朮爾鈔帛辛丑命懷王圖帖睦爾出居建康壬寅太白犯建星戊申以乞刺失思八班藏卜爲吐蕃路宣慰使都元帥往鎮參卜郎之地庚戌帝諭宰臣曰曷者卓爾罕察苦魯及山後皆地震內郡大小民饑朕惟太祖開創之艱世祖混一之盛期與人民共享安樂常懷祗懼災沴之至莫測其由豈朕思慮有所不及而事或僭差天故以此示儆歟其與諸司集便民之事定議以聞閏月壬子朔大赦天下除江淮朔科包銀免被災地方差稅一年

罷不急工役置惠遠倉永需庫于海刺圖總管府罷永興
銀場聽民開采輸稅己卯山東廉訪使許師敬請頒族葬
制禁用陰陽相地邪說修滹沱河堤及野狐色澤桑乾三
嶺道二月丙戌頒道經于名山宮觀命道士祭五福太乙
神丁亥平伐苗部長的孃率戶十萬來降庚寅熒惑辰星
填星聚于畢廣西猺蠻潘寶陷柳城己亥封阿里迷失爲
和國公張珪爲蔡國公以善僧平章政事庚子以黃河屢
決立行都水監于汴梁命瀕河有司兼知河防事丙午造
玉御牀及象輦咸平府清河寇河合流失故道壞堤堰役
蒙古軍及民丁數萬修築夏四月癸巳敕宿衛馬駝歸官
廄毋散牧民間丁未封后父火里兀察爾爲威靖王戊申
以許師敬爲中書左丞馮亨參知政事五月壬子車里陶

刺孟及大阿哀蠻兵乘象寇陷朶刺等十四寨木邦路蠻
八廟率熨夷寇陷倒八漢寨督邊將嚴設備癸丑龍牙門
蠻遣使來貢辛未罷京師官鬻鹽改河閒鹽運司爲大都
河閒等路都轉運鹽司癸酉融州否泉洞吉龍洞洞邨山
黑江諸徭爲寇丙子以國用不足敕減廩馬汰衛士罷營
繕節諸王歲賜停書金字藏經置諫議書院于昌平祀唐
進士劉蕡河決大梁六月己卯朔皇子生命巫祓除內宮
丙戌垣星犯井鉞星潯州平南縣徭作亂達魯花赤都堅
都監姚泰亨死之丙申中書參政左塔不台言大臣兼領
軍務前古所無鐵失以御史大夫耶先帖木爾以知樞密
院事皆領衛兵如虎而翼故成逆謀今軍衛之職勿令大
臣兼領庶勸舊之家得以保全帝嘉其直賜幣鈔丙午垣

星犯井丁未敕營造毋役五衛軍雲南阿只弄哀培蠻兵
寇開南州白夷寇雲龍州秋七月戊申朔大小車里蠻獻
馴象甲寅鎮康路土官佉囊謀粘路土官賽兀羅來降左
丞許師敬編類帝訓成更名皇圖大訓命于經筵進講以
師敬充經筵官己未置車里軍民總管府以土人寒賽爲
總管癸亥遣湖廣左丞乞住等將兵討廣西叛猺特命諸
王幹耳朵罕監其軍海北猺長盤吉祥寇陽春庚午思州
洞蠻楊銀千等來獻方物封駙馬孛羅帖木爾知樞密院
事火沙竝爲郡王壬申加朵台太傅圖忽魯太保日至禁
中集議國事敕山東州縣收養流民遺嬰八月戊子修上
都香殿癸巳歲星犯天罇辛丑敕諸王私入京者勿供億
諸部曲宿衛私入京者加罪命度支監汰阿塔赤所掌駝

馬九月戊申朔分天下爲十八道遣使宣撫詔曰朕祇承
洪業夙夜惟寅凡所以圖治者悉遵祖宗成憲曩者屢詔
中外百司宣布德澤蠲賦詳刑振恤貧民思與黎元共享
有生之樂尙慮有司未體朕意庶政或闕惠澤未周承宣
者失於撫綏司憲者怠於糾察俾吾民重困朕甚憫焉今
遣奉使宣撫分行諸道按問官吏不法詢民疾苦審理冤
滯凡可以興利除害者從宜舉行四品以上有罪停職申
請五品以下就便斷決其有政績尤異暨晦跡巨園才堪
輔治者具以名聞命馬合某李處恭之兩浙江東道朵列
圖齊履謙之江西福建道舉林伯蒙弼之江南湖廣道李
家奴朱贊之河南江北道阿吉利曹立之燕南山東道別
帖木爾韓讓之河東陝西道納哈出董訥之山北遼東道

眾家奴韓廷茂之雲南省寒食劉文之甘肅省圖思廉惇之四川省帖木爾不花吳秉道之京畿道己酉敕有司治義倉募富民入粟拜官以備振諸王幹卽遣使貢金浮屠甲寅禁饑民結扁擔社傷人者滿杖丁丑浚河閒陳玉帶河冬十月戊寅朔廣西岑世興復叛結八番蠻寇上林等州壬辰熒惑犯氐癸巳填星退犯井丁酉廣西徭蠻何童降請防邊自効十一月戊申周王和世琜遣使獻豹改長寧軍爲州丁巳幸大承華普慶寺祀順宗昭獻元聖皇后于影堂戊午填星退犯井及鉞星庚申廣西宣慰使獲徭賊潘寶下之獄其弟潘見復寇柳州壬戌定軍民官廕襲者由本貫圖宗支申請銓授加倒刺沙錄軍國重事丁卯罷蒙山銀冶提舉司壬申諸王幹耳朵罕以追捕廣西徭

寇上聞帝曰朕自卽位累詔天下憫恤黎元惟廣徭屢叛殺掠良民故命爾等往討今聞迎降者眾宜更以恩撫之若果不悛嚴兵追捕勿縱十二月戊寅命塔失帖木爾爲右丞相錄軍國重事封薊國公乙酉熒惑犯天江辰星犯建星甲午太白犯壘壁陣詔山東陝西湖廣地接戎夷選宗室重臣往鎮京師多盜增置邏防官兵立捕盜賞格壬寅右丞趙簡請行區田法于內地以宋董煟所編救荒活民書頒州縣是歲保定路饑振鈔四萬錠糧萬五千石雄州水溢被災萬一千六百戶死者給鈔以葬內郡饑振鈔十萬錠米五萬石

三年丙寅春正月丙午朔高麗國王王章遣使賀正

自
祖至元二十一年正旦高麗使者不
會至是復至然其後亦不數見云播州蠻長黎平慶等

來降王子徵前翰林學士吳澄不起置都水庸田司于松江掌江南河渠水利己未以山東湖廣官田賜民耕人各三頃仍給牛具辛酉太白犯外屏二月壬午廣西全茗州土官許文傑作亂知州李德卿死之以乃馬台知樞密院事丁亥罷征徭兵召幹耳朵罕還本鎮戍兵如故丙申建顯宗神御殿于盧師寺賜額大天源延聖寺戊戌建殊祥寺于五臺山賜田三百頃庚子以察乃平章政事甲辰立典醫署隸詹事院三月乙巳朔帝以不雨自責命審釋重囚遣使分祀嶽瀆及京城寺觀丙午填星犯井及鉞星癸丑八番巖霞洞蠻來降歲輸布二千五百匹丁巳遣諸王失刺鎮北邊甲子命功德司簡歲修佛事一百三十七戊辰熒惑犯壘壁陣填星犯井庚午填星太白歲星聚于井

辛未泉州民阮鳳子作亂寇陷城邑軍民官失討坐罪夏四月丙戌鎮安路土官岑修廣爲弟修仁所攻來告命湖廣行省撫治之戊戌太白犯鬼壬寅熒惑犯壘壁陣夔州路米洞蠻田先什用等結十二洞蠻爲寇湖廣行省遣九姓長官招降之修夏津武河堤役夫萬七千五百人五月甲辰修鎮雷佛事三十一所乙巳罷福建歲供蔗錫廣西岑世興及鎮安路岑修文合山獠角蠻入寇命湖廣雲南兩省招諭之遣指揮使兀都蠻鑄西番呪語于居庸關崖石庚午湖廣永明縣五洞河西加木籠四部來降各立其土官領之六月癸酉朔播州蠻黎平愛謝烏窮爲寇宣撫使楊燕里不花招平愛出降烏窮不附命湖廣行省討之己亥納皇姊壽寧公主女撒荅八刺于中宮秋七月甲辰

造篆豹氈車三十乘丁未酉陽寨土官冉世昌寧遠州洞

蠻刁用竝入寇壬子修黑牙蠻荅哥佛事于水晶殿皇后

受戒殿中鑄五方佛銅像戊午敕入粟拜官者準致仕銓

格戊辰太白經天河決陽武漂民居萬六千五百餘家詔

瘞京城外棄骸八月戊寅以星變罷獵下詔恤民

通攷云詔宮中

買寶貨命省臣依累朝呈獻例給價毋得勒減稽遲以病商人甲午罷行宣政院及功德

司丁酉太白犯軒轅御女辛丑作天妃宮于海津鎮

自世祖未

年每海漕至先遣官祀天妃累朝無虛歲鹽官州海湓壞堤三十餘里遣使祭

海神大都昌平大風壞民居九百家九月辛亥命帝師修

灑淨佛事于大明興聖隆福三宮癸亥太白犯太微垣右

執法戊辰湖廣雲南各寨土官奉方物來獻卽其地置木

朵路木來州孟隆路哀培各甸竝給印冬十月辛未朔發

卒四千人治通州道辛巳太白犯進賢癸未河水溢汴梁
壞樂利堤役丁夫六萬四千人築之賜大天源延聖寺吉
安臨江二路田千頃省臣言養給軍民必藉地利世祖建
大宣文宏教等寺賜永業當時已號虛費成宗復構天壽
萬寧寺較前用增倍半若武宗之崇恩福元仁宗之承華
普慶租權所入益又甚焉英宗鑿山開寺損兵傷農而卒
無益夫土地祖宗所有子孫當共恤之臣恐茲後藉爲口
實妄興工作徼福利以逞私欲帝嘉其言終不能用十一
月庚子命翰林集世祖嘉言善行爲聖訓以時省覽兼備
經筵進講癸卯敕西僧每當元辰疏釋重囚仍聽宗正府
審奪辛亥追復前平章政事李孟官乙卯太白犯鍵閉辛
酉廣西透江團徭及扶靈青溪櫟頭等原蠻竝爲寇播州

蠻宋王保來降徙上都清寧殿于伯葉兒行宮十二月壬

午御史賈屋請祔武宗皇后于太廟不報

皇后列傳稱泰定四年崩而本

紀稱是年請祔不符俟攷

帝欲于來年元夕構鐙山于內廷御史趙師

魯諫遂罷其事丙戌聽陰陽家言發鈔三千錠施僧道及

乞人繫囚以禳天變丁亥寧夏地連震者四庚寅召江浙

右丞趙簡爲集賢大學士領經筵事己亥亳州河溢大寧

路水漂民居各八百餘家扶靈洞蠻劉季等來降是歲海

運米至京師者三百三十五萬一千餘石振饑民米計一

百二十餘萬石給鈔半之終元之世爲最多

四年丁卯春正月乙巳御史臺請親祀郊廟帝曰朕遵世

祖遺制其命大臣攝祀己酉太白犯牛壬子以中政院金

銀鐵冶歸中書命靖安王闊不花出鎮陝西諸王火沙阿

榮荅里皇子允丹藏卜

帝第三子

先後鎮北邊丁卯浚會通河

築鄒州護倉堤役夫三萬人二月辛卯白虹貫日三月辛

丑遣使江南求奇花異果癸卯和寧路地震丙午潮州路

判官錢珍挑推官梁楫妻劉氏不從誣楫下獄殺之事覺

珍自殺詔戮尸傳首辛酉命前太師伯忽預議大事食其

俸終身召翰林學士承旨張珪集賢大學士廉恂太子賓

客王毅悉復舊職敬儼爲集賢大學士竝商議中書省事

給累朝舊寶價鈔十萬二千錠渾河決發軍民萬人塞之

丁卯癸惑犯井以阿散火者知樞密院事夏四月辛未盜

竊武宗金主及祭器以典守不嚴罷太常院官癸未鹽官

州海溢命都水少監張仲仁發工匠二萬餘人塞之不止

癸巳高州徭寇電白縣千戶張恆戰死賜祠曰旌義甲午

奉安武宗新主以阿昔爾爲御史大夫五月乙巳命天師
張嗣成修醮鹽官州祀海發義倉粟振其民丁卯罷諸王
分地州縣長官世襲俾如常調官以三載爲攷元江路土
官普山一作普雙坐贓免遂結蠻兵作亂敕復其舊職德慶路
徭來降歸所掠男女悉給其親六月辛未命翰林譚資治
通鑑以進丁丑以災異罷兩都土木減諸郡繫囚乙未紹
慶路四洞蠻阿者降命爲蠻夷長官秋七月丁酉元江普
山復叛己亥內郡江南旱蝗薦至丞相以下竝乞解職有
旨無多辭朕當自儆卿等亦宜各欽厥職建橫渠書院于
郿縣祀宋儒張載甲辰播州謝烏窮來獻方物丁未敕經
筵講讀官非有代不得去職甲寅市旄牛于西域丙寅塞
保安鎮渠役民六千人八月戊辰罷奉元路采捕珍禽異

獸渚沱河溢發丁浚治河以殺其勢湖廣苗蠻祭伯秧寇

李陀寨乙酉作欽明殿成癸巳謚武宗皇后曰宣慈惠聖

后傳是年十一月崩而本紀作是月升祔互異俟攷英宗皇后曰莊靜懿聖升祔太

廟發衛軍八千人修白浮瓮山河堤鳳翔興元成都峽州

江陵同日地震九月丙申朔日食敕國子監仍舊制歲貢

生員業成者六人禁僧道買民田壬子太白犯房甲子定

職官贓污者流之廣海閏月己巳太白經天壬申以災變

赦天下仍祀天地享太廟致祭嶽瀆諸神冬十月己酉復

以趙世延爲中書右丞王士熙參知政事傅巖起爲吏部

尙書御史韓鏞言尙書三品秩巖起由吏累官四品於法

不得升遂止戊午辰星犯東咸壬戌命太常纂修累朝禮

儀開南土官阿只弄復率蠻兵爲寇十一月庚午授思州

土官田仁爲宣慰使播州謝烏窮爲蠻夷長官雲南蒲蠻來附卽其地置順寧府癸酉太白犯壘壁陣乙亥熒惑犯天江辛卯陽曲縣地震十二月庚子定捕盜格限內不獲者償其贓己未歲星退犯太微西垣上將是歲發米二十四萬九千石振大都饑三十萬石散京師流民

致和元年戊辰春正月乙亥諭百司凡不赴任及擅離職者奪其官避差遣者笞之丁丑命繪蠶麥圖頒農桑舊制十四條于天下己卯帝將畋柳林御史王獻等以歲饑諫帝曰其禁衛士毋擾民家命御史二人沿途巡察戊子罷河南鐵冶提舉司免陝西撈鹽罷益都諸縣食鹽二月庚申詔改元致和免河南白寶田糧被災州郡差稅一年流民復業者差稅三年疑獄繫三歲不決者省釋壬戌太白

畫見三月庚午雲南安隆寨土官岑世忠與兄世興相攻

籍其民三萬二千戶來降升其寨爲州以世興知州事土夷

攷云宋皇祐開餘姚人岑仲淑從狄青平儂智高畱鎮邕州子自亨襲爲沿邊安撫使來安路都總管後遷入喬利

跨有牂柯廣西雲南皆分壬申立萬戶府二領征西紅胖

羈土故岑氏之族爲取大禩軍甲戌雅濟國遣使來貢己卯帝御興聖殿受無量壽

佛戒甲申遣戶部尙書李家奴往鹽官祀海神命帝師造

浮屠二百一十六以鎮海己丑雲南土官撒加布降以其

地隸羅羅宣慰司徒懷王圖帖睦爾于江陵夏四月丙申

欽州搖黃焱等爲寇己亥禁蒙古色目人倣漢法守制違

者除名甲寅封唐柳州刺史柳宗元曰文惠昭靈公五月

甲子遣官分護流民還鄉仍禁聚至千人者杖一百丙寅

廣西晉寧縣僧陳慶安作亂建國改元己巳大理怒江甸

土官阿哀你寇樂辰諸寨庚辰有流星大如缶其光燭地
戊子以塔失帖木爾平章政事秋七月辛酉朔寧夏地震
庚午帝崩于上都壽三十六葬起輦谷終元之世不爲帝
立廟上諡止稱泰定帝

王禕曰武宗約繼世子孫兄弟相
及而仁宗不守宿諾傳位英宗仍

使武宗二子出居于外及英宗遇弒而明宗在北文宗在南
南晉王于世祖爲嫡孫于次爲長則求所當立者舍晉王

將誰屬邪舊傳英宗之弒晉邸與聞攷之
實錄皆不得其實傳聞之謬豈可信哉

論曰一代統緒之傳有正統卽有公論豈一時私意所能
傾倒磔裂者哉世祖明孝太子早卒皇孫成宗立追諡裕
宗成宗本裕宗第三子其同母二兄一爲晉王甘麻刺一
爲懷王荅刺麻巴刺本無嫡庶而晉邸居長成宗崩後無
嗣晉王之子泰定帝卽可嗣立乃因仁宗自懷慶入先靖
內難迎立其兄懷寧王於漠北是爲武宗所謂先入關者

王之非晉王子不當立而必立懷王子也及再傳至英宗遇弑晉王復自漠北入靖內難討賊嗣位是爲泰定與武仁之事相埒非武仁有功宗社而泰定無功也泰定踐阼卽以和林兵柄授周王使代己任屢通朝貢又召懷王自海南入朝京師錫封藩國移近江陵屢賜金幣是泰定於文宗兄弟有德而無怨也泰定太子冊立已五載父終子繼名正言順懷王周王安得入干大統乎若謂武仁當日原有傳位周王嗣及英宗之約則仁宗實背約在前可以責仁宗不可以責泰定也乃文宗篡立之詔謂泰定以旁支入繼正統遂偏甚至誣其與賊臣鐵失潛通陰謀冒干寶位追毀晉王顯宗廟室嗚乎以討賊之主而誣以通賊之罪是何言哉若謂武宗二子爲人心所歸泰定當舍子

而傳姪則何以天庥頒詔至關中至四川至遼東皆焚書
斬使起兵拒命則人心歸泰定之子而不歸武宗之子明
如星日是則燕木帖爾之爲逆臣懷王之爲逆立亦明如
星日固不待魯桓弑隱奪國已無所逃于春秋之責況欲
寬其罪於中途弑逆之後哉斯非難定之案而數百年尙
無定論請斷之以折曲沃桓叔之徒假託正諛者

元史卷十一終

元史卷十二

本紀十

明宗

明宗皇帝諱和世疎武宗長子也母妃亦乞列氏武宗生

二子長即帝次圖帖睦爾

即文宗

成宗大德三年命武宗撫

軍北邊以四年十一月壬子生帝成宗無子武宗入承大

統立弟仁宗爲皇太子約以次傳位于帝仁宗得立延祐

中

按仁宗紀延祐二年十一月封和世疎爲周王三年三月送周王之雲南而此及文宗紀皆云延祐三年封周

王年數互異故並議建東宮時丞相帖木迭爾欲固位取

改延祐中以概之寵乃議立英宗爲皇太子又與太后幸臣識烈門日譖帝

于兩宮于是封帝爲周王出鎮雲南置常侍府官屬以圖

忽魯尙家奴孛羅教化等爲常侍遣就鎮帝至延安時武

宗舊臣釐日沙不丁哈巴爾圖等來會潛與教化謀曰天

下者我武皇之天下王之出鎮本非上意由讒構致然請以其故白行省俾聞之朝廷庶可杜塞離間遂與數騎馳去先是阿思罕爲太師帖木迭爾奪其位出爲陝西行省丞相及教化等至卽與平章塔察爾行臺御史大夫脫里伯中丞脫歡悉發關中兵分道自潼關河中府入已而塔察爾脫歡中變襲殺阿思罕教化於河中帝乃西行至北邊金山西北諸王察阿台等咸率眾來附帝至其部與定約每歲冬居札顏夏居斡羅斡察山春則命從者耕于野泥十餘年間邊境寧謐仁宗崩英宗嗣立以帝遠居西北不足忌而鐵失等復構帝弟圖帖睦爾徙之瓊州英宗遇弑晉王以大宗入繼泰定元年改封圖帖睦爾爲懷王命居建康致和元年三月徙居江陵泰定帝崩于上都時僉

樞密院事燕帖木爾者武宗舊臣也方畱守京師乃召百官集興聖宮倡言曰武皇有聖子二人大統所在當迎立不從者斬之乃縛平章烏伯都刺等十人下之獄迎帝弟懷王于江陵遣其弟撒敦守居庸關子唐其勢守古北口以拒上都兵懷王入京師羣臣請正大統九月壬申懷王卽位于大都改元天厯時泰定帝子阿速吉八年甫九歲在上都丞相倒刺沙立之爲帝改元天順遣兵分道攻大都燕帖木爾帥師與戰上都兵屢北十月齊王月魯帖木爾舉兵應懷王襲入上都執倒刺沙等兩都道路始通當是時懷王已卽位稱帝號令天下非若仁宗之于武宗虛位以待其來者顧以帝居長恐不厭人望于是遣撒迪等相繼來迎帝遂發北邊舊臣尙家奴孛羅哈巴爾圖從至

金山嶺北武寧王徹徹圖僉樞密事帖木爾不花相繼至
乃命孛羅如京師兩都民聞帝使者至驩呼載道曰吾天
子果自北來矣諸王舊臣爭先迎謁所至成聚天厯二年
正月乙酉撒迪等至入見帝于行幄陳懷王固讓意丙戌
帝卽位于和寧之北扈行諸王大臣咸入賀乃遣撒迪還
京師命之曰朕弟曩好書史邇者得無廢乎聽政之暇宜
親賢士大夫講論史籍可知古今治亂得失汝往當以朕
意諭之二月壬辰宣靖王買奴自京師來覲辛丑追尊皇
妣亦乞列氏曰仁獻章聖皇后三月戊午朔懷王遣燕帖
木爾奉皇帝寶來上御史中丞八卽刺知樞密院事圖爾
哈等各率其屬以從四月癸巳燕帖木爾見帝于行在率
百官上皇帝寶帝嘉其勲拜太師右丞相如故復諭曰凡

京師百官朕弟所用者竝仍舊職燕帖木爾奏國家大事所繫者中書省樞密院御史臺宜擇人居之帝然其言乃以武宗舊臣哈巴圖爾平章政事伯帖木爾知樞密院事孛羅爲御史大夫甲午立行樞密院命知樞密院火沙領行院事賽帖木爾買奴竝同知行院事是日帝宴諸王大臣于行殿諭臺臣曰太祖有訓美色名馬人皆悅之然方寸一有繫累卽能敗名喪德卿等職居風紀亦嘗念及此乎天下國家譬猶一人之身中書其右手也樞密其左手也左右手有病治之以良醫省院闕失不以御史臺治之可乎凡諸王百司違法越禮一聽舉劾風紀重則貪墨懼猶斧斤重則入木深其勢然也朕有關失卿等亦當直言毋諱又命孛羅等宣諭羣臣曰世祖皇帝立省院臺及百

司庶府共治天下大小職掌已有定制復命廷臣集律令章程以爲萬世法列聖相承罔不恪遵成憲朕今居世祖所居之位凡省院臺百司庶政詢謀僉同翻譯所奏以告于朕軍機重務樞密院當卽奏聞毋以夙夜爲閒故爲稽畱其他有所言必先中書院臺其下百司贊御之臣毋得隔越陳請違者罰毋赦丁酉以鐵木爾脫爲上都畱守懷王立都督府及奎章閣學士院于京師以除目來上帝從之癸卯遣使如京師十日命左丞相鐵木爾補化攝告卽位于郊廟社稷立圖帖睦爾爲皇太子仍設詹事院以徹里鐵木爾平章政事闊爾吉思爲中書右丞甲辰加官吏送寶者秩一等從者賚以幣帛乙巳監察御史劾嶺北平章塔卽吉素非勲舊年已七十眊昏殊甚左丞馬謀本晉

郎部民郎中羅里圖魯忽皆晉郎衛卒不諳政務帝如其言罷黜之仍諭自今所當言者毋有所憚五月丁巳朔封帖木爾爲保德郡王庚申賜扈蹕宿衛士鈔帛癸亥命有司新武宗幄殿車輿庚午命燕帖木爾升用嶺北行省官吏選用潛邸舊臣御史大夫孛羅中政使尙家奴加特進典四宿衛士壬申封亦憐真八爲柳城郡王以八卽刺爲西臺御史大夫眾家奴爲中丞乙亥求皇太子故寶不知所在乃命更鑄丁丑皇太子發京師諸王駙馬及扈衛百官悉從行載乘輿服御送行在六月丁亥朔左丞相鐵木爾補化等以帝卽位攝告于宗廟社稷辛亥詔諭中書省凡國家錢穀銓選諸大政先啟皇太子然後奏聞癸丑丞相鐵木爾補化以久旱乞免帝曰修德應天乃君臣當爲

之事朕未嘗斯須忘也皇太子來會當與其國澤民利物者行之七月丙辰朔日食丙子授皇太子金寶壬午遣使詣京師敕平章哈巴圖爾同翰林國史院官致祭太祖太宗睿宗三朝御容發諸衛軍完京城八月乙酉朔次旺忽察都之地丙戌皇太子入見是日宴皇太子及諸王大臣于行殿庚寅帝暴崩年三十從葬諸帝陵是月己亥皇太子復卽位十二月乙巳上帝尊諡曰翼獻景孝皇帝廟號明宗

文宗紀作十月丙申事

蒙古語曰護都篤皇帝至順元年三月

壬申祔于太廟後至元六年十月加上尊號爲順天立道睿文智武大聖孝皇帝

元史卷十三

本紀十一

文宗

憲宗

文宗皇帝諱圖帖睦爾武宗次子明宗弟也母妃唐兀氏
大德三年武宗出鎮北邊帝以八年甲辰正月癸亥生武
宗崩傳位于弟仁宗延祐中仁宗立子英宗爲皇太子乃
封武宗長子明宗爲周王命鎮雲南而帝尙畱京師至治
元年中正使咬住誣告脫歡察爾等交通親王將構異圖
辭連潛邸于是出帝于瓊州未幾英宗遇弑晉王入立泰
定元年正月召帝于海南行至潭州復止之居數月乃還
大都改封懷王食邑端州六萬五千戶二年正月仍命出
居建康輟耕錄云文宗潛邸金陵適太平興國寺鑄大鐘
爲金數萬斤方在治上至取相嵌碧珠指環默祝
日若天命在躬此當不壞卽投液中鐘成珠宛然在上光
采煥發不以灼毀及登大寶方與近侍言向時祝天之議

以殊祥院使耶先捏掌其衛事時倒刺沙爲相災異數見而帝兄弟播越南北武宗舊臣恆思之致和元年春秦定帝出敗柳林以疾還宮諸王滿圖阿馬刺台太常禮儀使哈海宗正闊闊出等與僉樞密事燕帖木爾謀曰今主上疾日作將往上都脫不諱吾黨扈從者執上都諸王大臣般之居守者卽縛大都省臺官宣言武皇子當正位傳檄諸關守帥則大事濟矣三月秦定帝如上都滿圖闊闊出等從以西安王阿剌忒納失里居守燕帖木爾亦畱大都時耶先捏私至上都與倒刺沙圖弗利于帝乃復遷帝居江陵七月秦定帝崩于上都倒刺沙立皇太子阿速吉八改元天順遣使詣大都命平章烏伯都刺收百司印時梁王王禪遼王脫脫手握上都重兵而燕帖木爾實掌大都

樞密符鑰謀于西安王陰圖舉兵八月甲午黎明集百官
興聖宮燕帖木爾率阿剌帖木爾孛倫赤等十七人兵皆
露刃以欲立武宗二子意號於眾乃手縛平章烏伯都刺
伯顏察爾分命勇士執中書左丞朵朵參知政事王士熙
參議省事脫脫吳秉道侍御史鐵木哥亡世傑治書侍御
史脫歡詹事丞王桓等下之獄推前湖廣左丞相別不花
爲中書左丞相詹事塔失海牙平章政事湖廣右丞速速
爲中書左丞遣前河南參政明里董阿前宣政使荅里麻
失里馳驛迎帝于江陵密以意告河南平章柏顏令簡兵
備扈從己亥明里董阿至汴梁悉執行省官收諸司印甲
辰帝發江陵召鎮南王鐵木爾不花威順王寬徹普化湖
廣平章高昌王鐵木爾補化來會執湖廣左丞馬合某以

別薛代之遣前西臺御史刺馬黑巴等諭陝西陝西省臺官皆附上都不從般去使戊申進柏顏爲河南行省左丞相己酉上都聞大都師起其諸王大臣滿圖阿馬刺台哈海闊闊出等謀應大都事覺倒刺沙盡殺之庚戌帝至汴梁柏顏等陳兵扈行以阿禮代爲河南平章發平滌民塹遷民鎮禦遼東軍辛亥命燕帖木爾知樞密院事亦列出爲御史中丞壬子阿速衛指揮使脫脫木爾帥其軍自上都來歸命守古北口癸丑上都兵分道入犯脫脫木爾與戰於宣興縣禽平章乃馬台送京師戮之諸王失刺敗走丙辰燕帖木爾奉法駕郊迎丁巳帝至京師入居大內戊午以速速平章政事曹立爲中書右丞張友諒參知政事柏顏爲御史大夫趙世延爲御史中丞耶速台爾同知樞

密院事上都梁王王禪右丞相塔失鐵木爾太尉不花平章買閭御史大夫紐澤等兵次榆林九月庚申朔燕帖木爾督師居庸關遣其弟撒敦擊敗上都兵于榆林隆鎮衛指揮使幹都蠻以兵襲上都執諸王滅里鐵木爾脫木赤于陀羅臺歸于京師陝西兵起入河中府殺守官劫行用庫鈔以應上都太尉不花以兵掠居庸壬戌命高昌王鐵木爾補化知樞密院事耶先捏爲宣徽使徵五衛屯田兵赴京師調淮西平陽保定兵列營黃河聽策應上都諸王耶先帖木爾平章圖滿迭爾以兵自遼東入遷民鎮諸王八剌馬野先帖木爾以所部兵入管州丁卯諸王大臣伏闕請帝早正大位帝曰大兄在朔方以長以德當有天下朕敢紊天序乎燕帖木爾固請帝曰必不得已必明著朕

意播告中外而後可遣撒敦拒遼東兵于薊州元帥阿兀
刺守居庸關上都兵攻碑樓口指揮使耶速台爾禦之不
克戊辰以明里董阿闊闊台竝平章政事命襄陽萬戶楊
克忠鄧州萬戶孫節以兵守武關己巳鑄御寶成立行樞
密院于汴梁以耶速台爾知行院事將兵行視大行諸關
西擊河中潼關軍括北路民馬以摺疊弩分給守關軍士
上都諸王忽刺台引兵攻崞州庚午遣軍民守歸峽諸隘
辛未帝常服謁太廟分治叛黨烏伯都刺鐵木哥棄市朵
朶王土熙伯顏察爾脫歡等各流遠方壬申帝卽位受朝
賀改元大赦詔曰洪惟我太祖肇造區夏世祖混一海宇
爰立定制以一統緒宗親各受分地勿敢妄生覬覦世祖
之後成武仁英惟公天下之心以次相傳宗王貴戚咸遵

祖訓至於晉邸具有盟書願守藩服而與賊臣鐵失等潛通陰謀冒干寶位使英宗不幸罹於大故朕兄弟播越南北備歷艱險朕以叔父之故順承惟謹于今六年災異迭見權臣倒刺沙等專權自用疏遠勳舊廢棄忠良變亂祖宗法度空府庫以私其黨類大行上賓利於立幼顯握國柄用成其奸宗王大臣以神器不可久虛天下不可無主周王遠隔朔漠民庶皇皇已及三月誠懇迫切朕姑從其請謹俟大兄之至遂朕固讓之心已於致和元年九月日卽皇帝位其以致和元年爲天厯元年可大赦天下癸酉封燕帖木爾爲太平王將兵擊遼東軍徵左右兩阿速衛老幼軍赴京師不行者斬乙亥罷會福殊祥二院立太禧院設壽福會福隆禧崇祥四總管府隸之分奉神御殿祠

祭上都梁王王禪兵襲居庸關將士皆潰燕帖木爾軍次三河丙子王禪游兵至大口燕帖木爾還軍次榆河帝出齊化門視師戊寅詔諭中外曰近以奸臣倒刺沙烏伯都刺潛通陰謀變易祖宗成憲既已明正其罪凡回回種人不預其黨者各安業勿懼有因而煽惑者罪之敕軍中逃歸及京城游民敢攘民財者斬命畱守司完京城軍士乘城守禦燕帖木爾與王禪前軍戰于榆河北敗之追奔至紅橋阻水而陣上都樞密副使阿剌帖木爾指揮使忽都帖木爾以兵會王禪來助戰又敗之庚辰太白犯亢辛巳以別不花知樞密院事依前中書左丞相燕帖木爾與上都兵復戰于白浮之野敗之脫脫木爾與遼東軍戰于薊州之檀子山王禪等竄身山谷次日收集散亡復來戰

敦脫脫木爾前後夾擊又敗之追及昌平北王禪單騎走
甲申慶雲見定各道廉訪官用蒙古二人畏吾河西回回
漢人各一人各司書吏以職官教授各路司吏鄉貢進士
參用御史臺經歷品秩相當者除各道廉訪使都事除副
使譯史通事攷滿不得除御史靖安王闊不花將陝西兵
潛由潼關南水門入分據陝州乙酉以明里董阿平章政
事燕不鄰知樞密院事上都兵入古北口分掠石槽燕帖
木爾先遣撒敦倍道趨石槽掩其不備擊之自率大兵繼
至轉戰至牛頭山禽駙馬孛羅帖木爾等送闕下戮之脫
脫木爾與遼東軍戰薊州南殺獲無算調河南蒙古軍五
萬人增守京師臨清萬戶府軍萬三千五百人守益都般
陽諸海港丁亥遼東軍抵京城燕帖木爾拒之募丁壯乘

城固守令冀寧晉寧所轄代州雁門關崞州陽武關嵐州大澗口皮庫口保德州寨底天橋白羊三關石州塢堡口汾州向陽關隰州烏門關吉州馬頭秦王嶺二關靈石縣陰地關皆穿塹壘石以爲固戊子上都諸王忽刺台兵入紫荊關行樞密院卜顏幹都蠻指揮使耶速台爾將兵拒之西臺御史大夫耶先帖木爾起兵從大慶關渡河般河中府官河東官吏聞風棄城走召雲南左丞相耶爾吉尼不至冬十月己丑朔燕帖木爾引兵至通州擊敗遼東軍遣脫脫木爾將兵援紫荊關調江浙兵禦潼關河南兵守虎牢關庚寅燕帖木爾與遼東軍夾潞水而陣遼東軍宵遁辛卯以卽位告郊廟社稷時享之禮改用仲月癸巳忽刺台游兵進逼南城令京城戶出壯丁一人持兵仗從軍

士守城仍於諸門列甕貯水以防火燕帖木爾及陽翟王
太平國王朵羅台戰于檀子山之棗林其子唐其勢陷陣
殺太平死者蔽野甲午脫脫木爾章吉與耶先捏合擊上
都兵于良鄉轉戰至盧溝橋乙未燕帖木爾率軍循北山
西趣良鄉時諸將與忽刺台阿刺帖木爾戰于盧溝橋聲
言大軍至上都兵潰遣使頒詔至陝西省臺官毀詔械使
者送上都湘寧王八剌失里引兵入冀寧救萬戶和尙將
兵由故關援之殺獲甚眾會上都兵大至和尙退保故關
冀寧遂破戊戌調湖廣平章乞住以兵守歸峽左丞別薛
守八番以備四川軍諸將追阿刺帖木爾至紫荊關獲之
送京師棄市平章圖滿迭爾引遼東軍復入古北口燕帖
木爾與戰于檀州南敗之走還遼東辛丑以脫脫木爾知

樞密院事亦列赤爲御史大夫齊王月魯帖木爾東路蒙古元帥不花帖木爾以兵徑襲上都梁王王禪遁遼王脫脫被殺遂入城執丞相倒刺沙盡收上都諸王符印壬寅以耶先捏知行樞密院事章吉爲行院副使與知院事耶速台爾等將兵西擊潼關耶先帖木爾軍至晉寧本路官皆遁甲辰罷晉邸及遼王所轄路府州縣達魯花赤選流官代之丙申敕凡有罪者旣籍其家妻子竝免入官丁未以欽察台平章政事珙璐不花爲御史中丞以度支經用不足權停諸王駙馬宿衛官及內侍宮人歲給芻豆陝西兵至鞏縣黑石渡遂據虎牢進薄武關庚戌帝御興聖殿齊王月魯帖木爾奉上皇帝寶下倒刺沙于獄詔罷內郡兵江浙兵往潼關者仍還鎮辛亥雲南徹里路土官刁賽

銀羅甸土官哀贊等來貢癸丑燕帖木爾辭知樞密院事
命其叔蒙古元帥不花帖木爾代之覈上都倉庫錢穀甲
寅罷徽政院改立儲慶司湘寧王八剌失里趙王馬札罕
諸王忽刺台前承上都命各起兵南侵冀寧還次馬邑元
帥耶速荅爾執送京師耶先鐵木爾兵北趨懷孟至潞州
鐵木哥南破武關入鄧州河南大震丁巳毀顯宗室升順
宗附右穆第二室成宗附右穆第三室武宗附左昭第三
室仁宗附左昭第四室英宗附右穆第四室戊午奪上都
官吏符印制敕盜殺太尉不花有司論盜當抵法帝以不
花不道眾所共知宥盜死十一月己未重給內外百司印
命太保伯荅沙總兵北邊給遼東降軍行糧遣還民閒子
女被掠者命追理完娶庚申汰近歲白身爲官者辛酉耶

先捏兵至武安耶先鐵木爾以軍降河東州縣盡殺所署官吏癸亥帝宿齋宮甲子服袞冕享太廟辛未鐵木哥兵入襄陽知縣谷庭珪主簿張德死之癸酉雲南土官元江普山姚州高明威楚路脫放九十九寨必耶姑等各來貢甲戌安置泰定后及二妃于東安州杖諸王失刺流之遠方丁丑荆王耶速耶不干傳檄至襄陽鐵木哥引兵走庚辰遣使奉迎周王于漠北以敬儼平章政事徹里帖木爾爲中書左丞珙璐不花爲右丞癸未殺故丞相倒剌沙磔其尸于市王禪亦賜死馬某沙紐澤撒的迷失耶先鐵木爾等皆棄市甲申命威順王寬徹普化還鎮湖廣罷行宣政院及行都水監左丞相別不花罷十二月己丑朔以天壽節禁屠宰詔海船至福建賈易者江浙行省選廉吏征

其稅丙申幸大崇恩福元寺謁武宗神御殿竄耶先捏于南寧庚子大赦追賜諸王滿圖爲果王阿馬刺台爲毅王闊闊出等十七人竝賜功臣號命有司刻其功于碑陝西省臺官焚毀詔書坐當流以赦故永不錄用辛丑立龍翊侍衛親軍都指揮司分掌欽察軍設內宰司隸儲慶司罷中瑞司乙巳加柏顏太尉與亦列赤竝爲御史大夫戊申加柏顏太保知樞密院事甲寅復遣侍御史撒迪內侍不顏圖古思奉迎周王于漠北丁巳以徹里帖木爾轉中書右丞躍里爲左丞趙世安參知政事戊午免被兵郡縣雜役弛山場河漚禁私貸者俟秋成責償許蒙古色目人居喪守制是月復召雲南耶爾吉尼又不至加諡唐司徒顏真卿正烈文忠公陝西自泰定二年至是不雨大饑民相

食杭州鎮江池州等路水沒民田萬四千餘頃河北山東有年

天祿二年己巳春正月己未朔立都督府總左右欽察及龍翊衛軍庚申遣太府太監沙刺班奉金幣赴周王行在辛酉命高昌王鐵木爾補化爲左丞相王毅平章政事欽察台知樞密院事燕帖木爾爲御史大夫甲子太白犯壘壁陣辛未封知樞密事火沙爲昭武王多列帖木爾復爲楚王甲戌復鹽制每四百斤爲引引爲鈔三錠丁丑減鷹房等食鷹師豹之食舊支肉價二百餘錠近增至萬三千八百錠控鶴舊止六百二十八戶今增至二千四百戶故辛巳起復中書左丞史惟良爲御史中丞以阿禮平章政事壬午贈緱山處士杜瑛爲翰林學士諡文獻癸未遣宣靖王買奴往周王行在丙戌周王卽位于和寧

二月庚寅命燕帖木爾復爲右丞相辛卯立妃弘吉刺氏
爲皇后帝御殿受朝賀廣西思明路總管黃克順來貢癸
巳遣翰林侍講學士曹元用祀孔子于闕里辛丑追尊皇
妣唐兀氏曰文獻昭聖皇后雲南蒙通蒙甸開南銀沙
羅甸等土司各入貢己酉熒惑犯井辛亥合肥縣地震壬
子命有司造行在帳殿甲寅立奎章閣學士院于興聖殿
西命儒臣進講經史設羣玉署藝文監隸之復設藝林庫
廣成局隸藝文監輟耕錄云奎章閣爲屋三間南向設御坐
左右列珍玩初名奎章閣隸東宮後升爲奎章閣學士監
置羣玉內司掌祕玩古物藝文監檢校書籍鑒書博士監
辨字書授經郎教怯薛官大臣子孫藝林庫收貯羣籍廣
成局印行國制等書製牙牌五十上書奎章閣命虞集撰記
佩出入宮門無禁○東山文集云建奎章閣命虞集撰記
御書刻石識以天厯之寶或加用奎章閣寶應賜者必關
學士持詣榻前四復奏然後予之○硯北雜志云奎章
閣壁有宋徽宗畫承平殿曲宴圖并書自製曲宴記命

更鑄鈔板毀其剋者三月辛酉遣燕帖木爾奉皇帝寶詣行在復命有司齎金千五百兩銀七千五百兩幣帛四百匹金腰帶二十副以備賜予癸亥命造乘輿服御北迎大駕改潛邸所幸諸路名建康曰集慶江陵曰中興瓊州曰乾寧潭州曰天臨戊辰雲南諸王荅失不花等數丞相耶爾吉尼專擅十罪將殺之耶爾吉尼遁入八番荅失不花僞署參政等官已已建大龍翔集慶寺給鈔萬錠丁丑帝母文獻昭聖皇后神御殿月祭命如列聖故事夏四月癸卯行在遣武寧王徹徹圖來錫命立帝爲皇太子丙午占臘國貢羅香木及象豹白猿戒諸王分邑達魯花赤受代不得仍畱官所其父兄所居官子弟不得再任辛亥振鄧州通州被兵民所俘子女命遼陽行省簿錄完聚河南陝

西諸路饑召商入米中鹽行入粟補官之令并括江淮僧道餘糧五月丁巳朔遣翰林學士承旨阿鄰帖木爾北迎大駕庚申太白犯鬼甲戌命中書省擬注中書六部官奏于行在丙子改儲慶司爲詹事院丁丑帝發京師北迎戊寅次大口庚辰次香水園六月丁亥朔鐵木爾補化以旱乞避相位諭曰皇帝遠在沙漠未能卽至是以暫攝大位今亢陽爲虐皆予闕失所致汝其勉盡職業祇修實政以上荅天變仍命馳奏行在丁未太白晝見庚戌次于上都之六十里店辛亥賜岐陽書院額祀周公爲文憲王仍設學官春秋釋奠秋七月丙辰朔日食丁巳次上都之三十里店己未更定遷徙法驗所居遠近以千里爲率在道遇赦者得放還再犯者徙本省不毛之地本犯死妻子聽歸

癸亥太白經天辛巳令諸王封邑達魯花赤擇本部年二

十五以上識治體者補充冒濫者罪及王傳八月乙酉朔

行在次于旺忽察都之地帝以皇太子入見明宗宴太子

及諸王大臣于行殿庚寅暴崩帝入臨哭盡哀燕帖木爾

傳皇后八不沙命奉寶璽授帝遂還

綱目云有謂燕帖木爾初上璽綬明宗從

官不爲禮燕帖木爾怒且懼既而明宗暴崩燕帖木爾聞哭聲即奔入帳中取寶璽扶帝上馬南馳壬辰命

柏顏爲左丞相欽察台阿爾思蘭海牙趙世延竝平章政

事多爾只爲右丞阿榮趙世安竝參知政事塔失鐵木爾

知樞密院事鐵木爾補化鐵木爾脫竝爲御史大夫癸巳

帝至上都乙未流諸王忽刺出于海南己亥復卽位大赦

詔曰朕惟太祖肇造帝業列聖相承世祖旣大一統卽建

儲貳惜我裕皇天不假年成宗入繼纔十餘載我皇考武

宗歸膺大寶克享天心志存不私以仁廟居東宮遂嗣宸
極甫及英皇降割我家晉邸違盟構逆據有神器天示譴
告竟隕厥身於是宗戚舊臣協謀舉義正名討罪揆諸統
緒屬在眇躬朕念大兄播遷沙漠以賢以長厯數宜歸力
拒羣言至於再四乃曰艱難之際天位久虛則眾志弗固
恐墮大業朕雖從所請秉志不移是以固讓之詔始頒北
迎之使隨遣尋奉寶璽遠返于途先帝受寶卽位之日卽
遣使授朕皇太子寶朕幸釋重負實獲素心乃率臣民前
迎大駕而先帝跋涉山川蒙犯霜露道里遼遠自春徂秋
懷艱阻于歷年望都邑而增慨徒御弗愼屢爽節宣信使
往來相望道路彼此思見交切於懷八月一日大駕次旺
忽察都朕欣瞻對有期兼程先進相見之頃悲喜交并何

數日之間而宮車弗駕國家多難遽至于斯念之痛心以夜繼旦諸王大臣復謂祖宗基業之隆先帝付託之重天命所在誠不可違請卽正位以安九有朕以先皇奄棄方新摧怛何忍銜哀辭對固請彌堅執諄伏闕者三日皆爲宗社大計乃以八月日卽位于上都可大赦天下

時帝再卽位距

明宗之崩止十日

庚子命阿榮趙世安督造建康龍翔集慶寺且

命臺臣監工癸卯幸世祖所御幄殿祓祭遣欽察台還京師經理政務燕帖木爾畱上都監給恩賚金幣己酉車駕發上都庚戌復改詹事院爲儲政院以衛侯司及江淮財賦諸色民匠二總管府隸之甲寅前丞相別不花潛與日者推測聖算命安置集慶九月乙卯朔市故宋太后全氏田爲大承天護聖寺永業改太禧院爲太禧宗禋院辛酉

命凡往行在所送寶官吏越次超升者皆從黜降丁卯帝
至大都敕翰林奎章閣輯本朝典故準唐宋會要名經世
大典戊辰定使者頒詔赦率日行三百里既受命而逗畱
三日及所至宴飲稽期者治罪取賂者以枉法論甲戌廣
西思明州黃宗永雲南威楚路哀放脫放木邦路渾都各
遣子來貢丙子立溫州路竹木場論耶先捏以不忠不敬
伏誅癸未建顏子廟于曲阜所居陋巷冬十月甲申朔帝
服袞冕享太廟辛卯立元江宣慰司於雲南甲午敕朝官
以三十月爲一攷外任以三年爲滿除風憲官役不得越
制遷調丙申命江西湖廣分漕米四十萬石以紓江浙民
力賜天妃廟額曰靈慈加上大行皇帝尊諡曰翼獻景孝
皇帝廟號明宗壬寅大寧路地震命諸王公主官府寺觀

賜田悉輸租於官給鈔以酬其直癸卯改瓊州安撫司曰
乾寧安撫司升定安縣爲南康州以土人王官知州事甲
辰徵朵朵王世熙等十二人於貶所放還鄉里追封三寶
努爲郢城王諡榮敏庚戌以親祀太廟禮成詔天下罷大
承天護聖寺工役囚在獄三年疑不決者釋之免民間拖
欠官錢無可追徵者大都至上都諸驛供給繁重悉官爲
應付免徵奉元路商稅并各處煎鹽竈戶雜役申私宰馬
牛禁十一月丙辰詔列聖諸宮后妃陪從之臣永給衣廩
芻粟戊午特命多耳只亦都護爲河南行省丞相近制行省不設丞相帝以其先朝舊臣不拘此例癸亥以闊徹伯知樞密院事位居眾知
院上罷功德司入宣政院己巳以撒迪爲中書右丞癸酉
太陰犯填星丁丑造青木棉衣萬領賜圍宿軍十二月丙

戊詔百官言朝政得失錄所上章疏善者卽行庚寅定風
憲官赴任毋拘遠近均給驛辛卯詔諸僧寺田當輸租者
仍免役僧還俗者聽復爲僧己亥加封大都城隍神爲護
國保寧王加諡漢長沙王吳芮爲長沙文惠王壬寅命江
浙印佛經二十七藏甲辰罷吐蕃巡捕都元帥府以玘璐
不花爲御史大夫兼領隆祥府事辛亥改上都餽頭山爲
天厯山壬子織武宗御容成卽神御殿作佛事敕凡階開
府儀同三司者班居一品上是歲陝西饑民一百二十三
萬餘口河南餓死者二千餘人山東饑民六十七萬六千
戶振鈔百三十四萬九千六百錠糧二十五萬一千七百
餘石討平四川囊加台雲南諸王圖堅之亂滇蜀悉定
至順元年庚午春正月丁丑遣使齎黃金二千兩詣杭州

書佛經已卯封太醫院使野里海牙爲秦國公辛巳改大
都田賦提舉司曰宣農荊襄提舉司曰濟農香戶平江提
舉司曰善農加封秦蜀郡太守李冰爲聖德廣裕英惠王
其子二郎神爲英烈昭惠靈顯仁祐王冰爲蜀郡守鑿離
堆以溉民田千里而無水患號爲陸海蜀人德之二月壬午朔以趙世安爲御史中丞史
惟良爲中書左丞雲南麓川蒲蠻來貢丁亥命富民輸粟
補官庚寅命奎章閣譯國朝典章爲漢語入經世大典趙
世延虞集等專任纂修虞集等辭職帝曰昔我祖宗睿知
聰明其於致治之道自然生知朕以統緒所傳實在眇躬
夙夜憂懼自維早歲跋涉艱阻旣乏生知之哲於國家治
體豈能周知故立奎章閣置學士員日以祖宗明訓古昔
治亂得失陳說於前使朕樂於聽聞卿等其悉所學以稱

朕意勿復再辭壬辰籍張珪子五人家產自庚寅至甲午京師大霜晝零丁酉帝及皇后皇子與明宗皇子竝受佛戒乙巳封明宗子懿璘質班爲郕王平章朵爾失以罪免丁未命柏顏知樞密院事依前太保錄軍國重事帝以燕帖木爾有大功欲獨相以尊異之諭省臣曰昔世祖嘗以宰相一人總庶務故政治出于今燕帖木爾爲右丞相柏顏旣知樞密院事左丞相其勿復置戊申以虞集爲奎章閣學士敕正旦天壽節內外諸司贊獻仍如舊進辛亥以屯田子粒錢萬錠助建佛寺市故瀛國公趙鼎田給大龍翔集慶寺御史臺言不必予直帝曰朕建寺爲子孫黎民計若取人田而不予直非朕志也行樞密院言成雲南軍逃歸捕獲法當死帝曰非臨陣而逃輒當以死何視人

命之易邪其杖而流之三月戊午封皇子阿剌忒納答剌爲燕王徙封濟陽王木楠子爲吳王吳王潑板爲濟陽王命彰德路歲祭羗里周文王祠己巳以明宗升祔序英宗上視順宗成宗廟遷例甲戌封諸王速來蠻爲西寧王夏四月壬午朔立益都廣農提舉司括益都般陽寧海閑田十六萬二千九十頃賜大承天護聖寺辛丑明宗后八不沙崩己酉徙明宗長子妥懽帖睦爾于高麗帝卽順五月戊午羣臣上帝尊號曰欽天統聖至德誠功大文孝皇帝是日改元至順詔天下丁卯英宗實錄成辛未置宣忠扈衛親軍都萬戶府總幹羅斯軍以亦列出平章政事甲戌八番乖西觥苗侵邊詔樞密院分兵討之乙亥置順元宣撫司統答剌斥軍六月辛巳朔河決大名庚子知樞密院事

闊徹伯脫脫木爾通政使只爾哈郎翰林學士教化的中
政使尙家奴謀殺燕帖木爾事覺竝伏誅秋七月辛亥封
諸王按渾察爲廣寧王通渭山崩壓民舍乙丑以耶爾吉
尼知樞密院事庚午歲星犯氐中書省言近歲帑廩虛空
其費有五曰賞賜曰作佛事曰創立衙門曰冒濫支請曰
續增衛士鷹房詔與院臺同加汰減丁丑福州王薦以隱
逸旌其門閨月庚辰朔封諸王卯澤爲永寧王辛卯以脫
亦納參知政事趙世延以年老罷癸巳發鈔萬錠分賜天
厯初諸王羣臣死事之家戊戌封甘肅平章乃馬台宣寧
郡王駙馬謹只爾鄆國公戊申加封孔子父齊國公叔梁
紇爲啟聖王母魯國太夫人顏氏爲啟聖王夫人發成都
沙餉戶三百人防遏敘州八月辛亥遣太禧院監蔚州廣

靈縣銀鑛歲入歸大承天護聖寺甲子烏蒙土官阿朝忠

州土官黃祖顯各遣子來朝戊辰太白犯氏壬申詔裁汰

衛士定大內四怯薛每宿衛不過四百人累朝宿衛士各

衛士不過二百人應房萬四千二十四人減去四千八人內

養九百九十九人四怯薛當番者各百人累朝舊邸宮分養

人三千二百二十四人當番千一百二十人賸臣怯憐口

共萬人當番六千人其汰去者斥歸土著應役有容匿漢南高麗人

及奴隸濫充者怯薛官與其長各杖沒家貲之半九月庚

辰罷入粟補官例大寧路地震己丑熒惑犯鬼辛卯監察

御史葛明誠劾遼陽平章哈剌鐵木爾前經坐贓被杖王

文若劾嶺北平章哈巴爾圖鄙俚無知竝從其言罷黜癸

巳白虹貫日置麓川路軍民總管府復立總管府于哈刺

火州甲午熒惑犯鬼積尸氣史惟良辭歸賜鈔三百錠建

五福太一宮於京城乾隅每歲四祭丁未以張友諒爲中

書左丞冬十月戊申朔飭衍聖公崇奉孔子廟事壬子立

宣忠扈衛親軍都萬戶營於大都戊午帝致齋大明殿庚

申出次郊宮辛酉帝服大裘袞冕祀昊天上帝於南郊以

太祖皇帝配禮成大赦天下自世祖至是凡七世有大祀皆攝事至是始舉親祀之禮

甲戌敕累朝宮分官署凡文移無得稱皇后止稱某位下

娘子其委用官屬竝由中書擬奏元制每朝自正宮外率多稱皇后太祖光獻皇

后外稱皇后者四幹耳朵共二十一位太宗憲宗各五位世祖自順聖皇后外四幹耳朵共七位他倣此至是始定

其稱謂云賜伯夷叔齊廟額曰聖清歲春秋祀以少牢十一月

辛巳陝西左丞怯烈坐受人僮奴及鸚鵡御史臺請論如

律帝曰位至宰執食國厚祿猶受人生口罪固宐也至以

鸚鵡微物論賊失之苛嗣後凡饋禽鳥者勿以賊論甲申

熒惑退犯鬼丙戌太白犯壘壁陳樞密院請依舊制全給

鷹房芻粟帝曰國用皆百姓所供當量入爲出朕豈以鷹房失所重困吾民哉不從辛卯以開闢台知樞密院事兼大都留守辛丑徵河南民自實田糧不通舟楫者許以鈔代十二月己酉以董仲舒從祀孔廟定國子生積分及等者省臺集賢院奎章閣官同攷試中式者依等第授官不中者復入學肄業辛亥立燕王阿剌忒納答剌爲皇太子癸亥恩州諸王按灰坐擊傷巡檢官杖之謫還廣寧王所部充軍甲戌敕各行省凡邊防有警許便宣發兵是歲汴梁大名等路饑民六十七萬七千戶各給米鈔安豐廬州饑以兩淮鹽課鈔振之

二年辛未春正月己卯加大承天護聖寺僧寶峯壇主嚴吉祥爲司徒癸未立侍正府以總近侍遣官按行北邊牧

地丁亥以晉邸部民二萬四千餘戶隸壽安山大昭孝寺
爲永業戶辛卯皇太子阿剌忒納荅刺薨耐葬山陵甲辰
敕建孔子廟於後衛乙巳監察御史劾本臺中丞和尙受
人婦女御史臺又連劾福建宣慰使哈只燕南廉訪使卜
咱爾貪污及奎章閣參書雅琥阿媚權臣詔以赦前竝禁
錮元籍御史萬家閭嘗薦和尙脫嘗舉卜咱爾竝連坐
封蒙古巫者所奉神爲靈感昭應護國忠順王號其廟曰
靈祐二月戊申立廣教總管府掌僧尼之政曰京畿山後
道遼東山北道河南荆北道兩淮江北大道湖北湖南道浙
西江東道浙東福建道江西廣東道廣西兩海道又燕南
山東陝西甘肅四川府設達魯花赤同知判官各一員宣
雲南諸路凡十六所
政院選流內官擬注總管則以僧爲之四川懷德府驢谷
什用田先什用等及生蠻十二洞內附升其府爲宣撫司

諸洞各設長官己酉白虹貫日壬子太白晝見以伯撒里
平章政事朵爾只班參知政事高履亨許有壬並參議省
事乙卯太白犯昴壬申雲南景東甸蠻官阿只弄遣子獻
馴象升甸爲景東府常賦外歲增輸金五十兩修上都洪
禧崇壽殿三月丙子朔熒惑犯鬼丙戌雨土霾司徒香山
陳符讖請頒告中外不允香山言陶弘景胡笳曲有負展
生年紀號適合此實天命之符天麻終是甲辰君之語陛下
子賓客薛讓進武后鼎銘云上天降監諸臣謂唐開元間太
受命之符姚崇表賀宋司馬光斥其采偶合之文爲符瑞
乃小臣之諂而宰相實之是侮其君也今從其言恐啟識
緯之端非所以定民志事遂寢癸巳製累朝神御殿名世祖曰元壽世祖
順聖皇后曰睿壽南必皇后曰懿壽裕宗曰明壽成宗曰
廣壽順宗曰衍壽武宗曰仁壽皇妣昭聖皇后曰昭壽仁
宗曰文壽英宗曰宣壽明宗曰景壽御史臺劾大都總管

劉原仁僥倖巧宦工部尙書蘇炳性行貪邪詔罷其職壬寅析欽察爲左右二衛癸卯以儒學教授聽選者多凡仕由內郡江淮者注江西江浙湖廣由陝西兩廣者注福建由甘肅四川雲南福建者注兩廣夏四月丙午朔全寧民王脫歡獻銀鑛詔設銀場提舉司隸中政院庚戌頒天厯初兵興功賞帝曰燕帖木爾首倡大義躬擐甲胄柏顏在河南先誅攜貳使朕道路無虞兩人功無與比其賞不可與眾同加賜七寶腰帶金帛真定武涉縣地震逾月不止戊午命興和建屋居海青上都建屋居鷹鵠甲子平章欽察台獻名園給鈔千錠酬其直御史張益劾欽察台在英宗朝陰與中政使咬住造謀誣告反覆不可信用詔奪職禁錮廣東且降旨獎益直言戊辰奎章閣以修經世大典

請從翰林國史院取脫卜赤顏一書

即今之起居注

紀累朝故事

學士承旨押不花言此祕禁國書非可令外人傳者不與

詔以泥金畏吾字書無量壽佛經千部并大乘經一藏敕

在京百司日集公署自晨及暮毋廢事五月丁丑熒惑犯

軒轅左角丙戌諭太禧宗禋院汰僧徒

累朝所建大萬安等十二寺舊額僧

三千一百五十人歲給衣糧今其徒猥多汰去九百四十三人

己丑置雲南孟定孟育蘆

傳三路總管府者線蒙慶甸銀沙羅等甸竝爲軍民府孟

併孟廣者樣等甸竝設長官司皆土人爲之癸巳威楚路

蒲蠻猛吾來朝願入銀爲歲賦詔置散府一及土司三十

三所甲午太白犯畢以平江官田五百頃立稻田提舉司

隸宮相都總管府乙未以脫別台知樞密院事纂修經世

大典成丙申八番西蠻官阿馬路入貢庚子太陰犯太白

辛丑太白經天甲辰改阿速萬戶府爲宣毅萬戶府六月
乙巳朔徵儲政院鈔三萬錠給中宮道路費丁未太白晝
見乙卯御史陳良劾江浙廉訪使脫脫赤顏私收父妾冒
封詔罷職追還封制癸亥定辭訟起減由己者罪加常人
一等免控鶴衛士當驛戶丁卯太陰犯畢太白犯井集賢
大學士吳澄卒特徵河南儒士吳炳爲藝文監典籍秋七
月甲戌朔從藝文少監歐陽玄言改給衍聖公銀印海南
黎蠻作亂時建大興龍普明寺于海南工費繁多黎人不勝其擾故亂壬辰命脫別台
爲御史大夫乙未立閔子書院于濟南丁酉調甘州兵守
參卜郎以防吐蕃戊戌封柏顏爲浚寧王八月甲辰朔日
食封脫憐忽圖魯爲靖恭王沙藍朵爾只爲懿德王內史
怯烈該爲豐國公甲寅御製上都孔子廟碑乙卯太白犯

軒轅大星己未內侍撒里不花坐巫蠱事杖流海南庚申
太白犯軒轅左角九月癸酉朔築駐蹕臺于大承天護聖
寺東御史臺劾四川參政馬鎔冒借俸鈔娶妾且詬詈平
章汪壽昌帝曰綱常之理尊卑之分懵無所知其何以居
上臨下可亟罷斥之又言江西參政李允中乃宦者李邦
寧養子不堪任重選竝削籍丙子太白犯填星海南賊王
周糾十九洞黎蠻作亂命湖廣左丞移刺四奴討之癸巳
罷供需府覆實司改立廣設司禁諸驛毋畜竄行馬冬十
月丁巳以江浙平江等路水傷稼減明年海漕米遣官赴
通潮陵滄四州和糴粟豆以足國用乙丑立昭功萬戶都
總府丙寅命大都路定時估每月朔望送廣設司以酬物
價十一月壬申朔日食詔四川給鹽雲南啖馬

亦奚不薛之地所牧

官馬歲給鹽以每月上寅日啖之則馬健無病比因亂雲南無鹽馬多死故令四川給之丙子封諸王幹卽爲保寧王蘸班爲豳國公以耿煥參知政事癸未帝養燕帖木爾子塔剌海爲子賜居第詔每歲遣樞密院宗正府官巡察遼陽諸郡毋令諸王所部擾民辛卯定諸鹽課鈔以十分之一收銀銀每錠五十兩折鈔二十五錠十二月戊申西臺御史高坦劾御史陳良逞勢蔑法有旨奪其敕命以黃金符鐫文曰翊忠徇義迪節同勳賜都指揮使欽察旌其天庥初紅橋戰功壬子復命諸王忽剌出還鎮雲南癸丑定諸職官父母在者三年聽給定省假無父母者五年聽給拜墓假各計道里遠近立限期其匿而不省覲者坐以罪丁巳雨木冰辛酉遣官詣各道錄囚是歲徙安權貼睦爾于廣西之靜江發通州官糧振檀順昌平

民九萬餘戶出山東鹽課鈔振盭都民三萬餘戶博興州民九千戶

三年壬申春正月己卯廣西羅韋里叛寇馬武冲等合龍州嶺北朗龍洞韋大蟲攻陷那馬達那馬安等砦壬午加封孔子妻鄆國夫人拜官氏爲大成至聖文宣王夫人戊戌諸王章吉獻幹羅思百七十人酬鈔五千錠庚子萬安軍黎蠻王奴羅寇陵水縣夔路忠信寨洞主阿具什用寇施州二月辛丑朔詔修曲阜宣聖廟命四川轉運鹽司兼邛州鹽井邛州有二井宋舊名曰金鳳茅池天麻初九月地震鹽水涌溢州民願作什器煮鹽輸課故令兼三月庚午朔發鈔萬錠給蒙古孤貧人已丑復立功德司及典瑞司掌中宮歲作佛事癸巳改皇子古剌荅納名曰燕帖古思乙未帝師泛舟高梁河調衛士三百人挽舟

夏四月壬寅四川師壁散毛盤速出三洞蠻野王等大盤
洞謀者什用等來貢戊午命奎章閣譯貞觀政要錢板印
賜百官五月己巳朔從撒迪請備錄帝固讓奏荅及訓敕
辭命續爲蒙古脫卜赤顏一書置之奎章閣癸酉熒惑犯
東井戊寅京師地震戊子遣使往帝師所居撒思吉牙一作
之地以珠織制書宣慰其屬仍分給鈔幣庚寅置山
東益都金銀銅鐵提舉司壬辰從太常博士王瓚言禁加
封淫祠丁酉白虹竝日出長竟天追封顏子父顏無繇爲
杞國公諡文裕母齊姜氏爲杞國夫人諡端獻妻宋戴氏
爲兗國夫人諡貞素六月己亥朔給還朵朵王世熙脫歡
等家貲竝聽錄用己酉以趙世安爲中書左丞乙丑從御
史陳思謙言嚴奪情起復之禁秋七月戊辰朔命僧於鐵

幡竿修佛事施金百兩銀千兩鈔萬錠壬午江西行省造

螺鈿几榻遺燕木帖爾詔賜匠者帛八月乙巳天鼓鳴於

東北丙午遣官祭社稷

每歲上戊之典秦定朝無文至是乃一祭

丁未有事於

太廟己酉隴西地震帝崩於上都壽二十九癸丑葬起輦

谷元統二年正月己酉上尊諡曰聖明元孝皇帝廟號文

宗蒙古語曰札牙篤皇帝三月己酉祔于太廟

順帝本紀作四月己

卯後至元六年以帝謀不軌使明宗飲恨而終詔除其廟

主

論曰元代諸帝不習漢文凡有章奏皆由翻譯其讀漢書

而不用翻譯者前惟太子真金從王惲王恂受學後惟文

宗潛邸自通漢文而已書畫譜言文宗在潛邸時召畫師

房大年俾圖京師萬歲山大年以未至其地辭文宗遂取

筆布畫位置頃刻立就命大年按橐圖上大年得橐敬藏之意匠經營雖積學專工有所未及始知文宗之多材多藝也及踐阼後開天章閣招集儒臣撰備經世大典數百卷宏綱鉅目禮樂兵農燦然開一代文明之治卽其聲色儉澹亦遠勝武宗此豈庸主所希及哉使其迎立明宗之日亦如仁宗之退處東宮他日明宗復如武宗之傳仁廟則一代而勝事再見雖殷人弟兄世及何以過此易曰開國承家小人勿用文宗之得大位也以燕帖木爾其得罪萬世也亦以燕帖木爾語曰治世之能臣亂世之奸雄文宗之不隕于大平王手者亦倖矣哉

寧宗皇帝諱懿璘質班明宗次子也母皇后乃馬眞氏明宗有子二人長妥懽帖睦爾次卽帝文宗天厯二年封帝

爲鄜王文宗崩右丞相燕帖木爾請立皇子燕帖古思皇后導揚末命申文宗固讓初志欲傳位明宗子時妥懽帖睦爾居靜江帝以文宗所眷愛獨畱京師於是燕帖木爾請立帝遣使徵諸王會京師甲寅中書省奉中宮旨預備大朝會賞賜金帛等物九月丁丑填星犯太微垣左執法辛巳修皇太后儀仗是夜地震有聲十月庚子帝卽位大赦時帝年七歲政務咸啟中宮取進止辛丑以撒敦爲御史大夫撒迪平章政事闊里吉思爲右丞圖爾哈知樞密院事復立徽政中政二院作兩宮幄殿車乘俱張己酉太白犯斗敕諸王駙馬大臣及省院臺秩正二品百司秩至一品者闕門內許施繩牀以坐丙辰命江浙省範銅造宣聖廟祭器凡百三十五事十一月壬申命鄜王徹徹圖鎮

遼陽戊寅尊皇后曰皇太后御興聖殿受朝賀壬辰帝殂
甲午葬起輦谷後至元四年三月辛酉上諡曰沖聖嗣孝
皇帝廟號寧宗四月乙酉附于太廟

順帝紀作至元三年事

烏乎春秋未踰年之君稱子故子般不與閔公竝立廟諡
寧宗以負屨弔月之殤而入廟稱宗立后嬖諡無一人引
大諡以匡正之斯元代禮臣博士之陋也修史者又踵其
失而立本紀斯又明臣之陋也今以附諸文宗本紀之末

元史卷十三終